إِنَّ الدِّينَ عِنْدُ النَّهِ الْإِسْلَامُ



لَا الْمَ اللَّالْ اللَّهُ مُحَمَّدُ رَّسُولُ اللهِ

hutba Jummah

HADHRAT MUHYI-UD-DIN AL-KHALIFATULLAH Munir Ahmad Azim

17 Novembre 2017 (27 Safar 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « *Le Livre Parfait* (*Partie 4*) »:

ذَلِكَ الْحِتَابُ لاَ رَيْبَ فِيهِ هُدًى لِّلْمُتَّقِينَ ٥ اللَّذِينَ يُؤْمِنُونَ بِالْغَيْبِ وَيُقِيمُونَ الصَّلاةَ وَمِتَّا رَزَقُنَا هُمُ يُنفِقُونَ ٥ والَّذِينَ يُؤْمِنُونَ بِمَا أُنزِلَ إِلَيْكَ وَمَا أُنزِلَ مِن قَبْلِكَ وَبِالآخِرَةِ هُمُ يُوقِئُونَ ٥

- 3. Zaalikal Kitaabu laa rayba feeh. Hudal-lil-Muttaqiin;
- 4. Allaziina yu'minuuna bil-Ghaybi wa yuqiimuunas Salaata wa mimma razaqnaahum yunfiquun;
- 5. Wallaziina yu'minuuna bi-maaa 'unzila 'ilayka wa maaa 'unzila min-qablik, wa bil-'Aakhirati hum yuuginuun.

- 3. Sa c'est le Livre dans laquelle péna aucaine doute; li ene guide pou bane qui oulé suive chemin droite,
- 4. Bane qui accepter ki bane chose invisible existé, qui pratique Salat (Namaz) et qui dépense en Zakat ene partie de ce qui Nous (Allah) fine donne zot,
- 5. Et qui accepter message qui fine descende lor toi et aussi bane messages qui ti envoyer avant toi, et qui accepter avec l'assurance séki pou vini après. (Al-Bagara 2: 3-5).

Azordi par la grâce d'Allah, mo pé contigne le même Khutba ki mo fine faire 3 Vendredis à suivre lor Quran, en récitant bane versets 3-5 de Surah Al-Bagara.

Bane croyants bizin au courant kan zot lire le Quran ki péna aucaine erreur, ni contradiction là-dans. Au contraire chaque verset du Quran li renforci ene l'autre verset et non pas ki li créer de doute. Donc, ena bane dimounes ki au lieu ki zot bane doutes dissiper avec le Quran, zot doute augmenter, bé sa bane dimounes là bizin conner ki zot pas parmi sa bane dimounes pieux ki fine mentionner au commencement là.

Bane dimounes pour laquelle le Quran péna aucaine doute et li ene guide pour zot, sans aucaine doute c'est bane *Muttaquun* (bane qui ena la crainte d'Allah, bane pieux). Donc, kan ou faire *duahs* avec Allah, ou aussi bizin comprend bane sujets du Quran ou sois demande Allah So aide pour faire ou comprend et *Insha-Allah*, Allah pour donne ou sa connaissance là pour comprend bien séki ena dans le Saint Coran. C'est lerlà ki ou lé cœur pour pure de toute sorte de doute. Mais l'amour pour le Quran aussi demander ki ou recherche directement avec li (c'est-à-dire, le Quran même).

Et Allah So bane sujets li illimité. Beaucoup de fois pour bane dimounes ki réfléchi coumsa, Allah (swt) faire zot comprend certain points. Et si zot bane *Muttaquun*, bé péna aucaine problème pour comprend séki Allah (swt) fine faire comprend dans Quran. Li vine bien facile. Mais si zot pas bane *Muttaquun*, bé sa même connaissance ki zot fine gagner là vine ene source de doute, de *fitna*, de disputes.

Mo conne beaucoup la caze kot pas faire cinq fois *Namaz* par jour et ni pé faire bane zenfants faire *Namaz* aussi et ena la caze pé lire *Namaz* mais zot pas pé faire *Telawat Quran*, ni pé faire bane zenfants aussi lire (le Quran). Li bien regrettable kot pas pé donne aucaine l'importance lors lire le Quran, kot *Barakat* (bénédictions) même na pas ena dans la caze.

Pour ene musulman faire so cinq fois *Namaz* par jour, bé li bizin faire *Telawat Quran*. Sans le *Telawat Quran*, so *Namaz* pour vide de récompense kot Allah (swt). Li pou ene *Namaz* kot pas pour ena aucaine utilité devant Allah (swt). Donc, séki pas encore commence le *Telawat Quran*, li bizin commencer et lerlà doucement doucement connaissance pour augmenter. Pou ou gagne bane significations là, li nécessaire ki ou ena impé connaissance. Pour gagne profonde connaissance divine, connaissance important. C'est pourquoi le Quran fine dire ki si ou ena pour demander, demande avec bane dimounes doués de connaissances. Fine dire aussi dans Quran ki Hazrat Muhammad (saws) enseigne la connaissance et ensuite la sagesse. Ena ene Hadith kot ene *Sahabi* (compagnon) ti demande Hazrat Aisha (ra) pour raconte le *Seerat* (la vie) de Hazrat Muhammad (saws). En réponse, Hazrat Aisha (ra) fine dire alle lire le Quran ou pou conne so *Seerat* et guette so la vie (Hazrat Muhammad (saws)) ou pou comprend le Saint Coran, kot avec sa bane paroles là ou pou comprend ki Hazrat Muhammad (saws) ti ene personnification du Saint Coran.

Donc, actuellement mo pé mette l'emphase pour commence lire le Quran et étudier li depuis le commencement, lerlà Allah (swt) pour prend compte le reste. Et bane dimounes ki commence sa voyage là, bé Allah (swt) même attrape zot la main et amène zot jusqu'à la fin du voyage. La fin du voyage veut dire ki continuellement jusqu'à zot la mort, zot fine avancer dans sa chemin là. Sinon en fait sa voyage là péna aucaine fin.

Donc avec sa série Khutba lor l'importance lire le Quran et comprend Quran, *Insha-Allah*, mo faire *duah* ki dans chaque la caze, pour ena le *Telawat Quran* tous les jours et avec le *Telawat Quran*, *Insha-Allah*, chaque la caze pour rempli avec bane *Namaz*i, kot *Taqwa* pour prend place dans ou lécoeur et d'ailleurs ene signification de *Taqwa* c'est l'humilité. Autant ki ou pou trouve ene dimoune *Muttaqi*, autant même ou pour trouve li humble et autant même ou pour trouve li pé courber devant Allah (swt).

Alors kan bane tel *Muttaqi* pose Allah bane questions, bé certainement Allah guide zot. L'amour pour le livre d'Allah est ene tel chose ki pour prend compte le future génération. Donc, couma mo fine dire avant, si ou fine grandi ou fine passe ou la vie couma ou oulé, ou sois couma Allah ouler. Sois ou pé passe ou la vie sous le plaisir d'Allah ou contre le plaisir d'Allah; ou fine fini grandi coumsa. Mais ou pour responsable si ou pas faire bane future générations gagne l'amour pour Allah, pour le Quran et pour cinq fois *Namaz* par jour. Ou pour responsable devant Allah (swt) et ou pas pou capave dire ki pas fine donne ou le message et pas fine mette ou en garde contre so conséquence ki pour bien dure.

Bizin faire ene tel façon pour ki zot gagne l'amour pour tous sa bane zaffaires là. Sinon si ou pas faire sa bane zéffort là pour établi zot lors le Quran, bé tout bane les reste zaffaire après sa, vine bane zaffaires dans vide, sans aucaine réalité. Li bien nécessaire mette l'emphase lors le Quran et bizin commence mette l'emphase lors récitation du Quran. Et aussi dans bane pays kot zot pas trop conne Arabe, li nécessaire faire lire impé traduction aussi. Couma mo ti dire ou avant, premier introduction ki pé faire pour le Quran, Allah (swt) pé dire 'Le Livre'. Ene livre ki tous bane religions ti pé attane. Kan livre là fine vini, combien fine tourne zot les dos are sa fine aller? Li pareil combien musulmans pé lire Surah Al-Fatiha et *Darood Shariff* par jour et zot pé demande Allah (swt) ki envoye sa bénédiction ki To fine envoyer lors Hazrat Ibrahim (as), lors Hazrat Muhammad (saws). Ki sa bénédiction là sa? Ki sa faveur divine ki pé demander tous les jours et aussi dans Surah Al-Fatiha, kot pé dire, "Ô Allah, guide nous sur le droit chemin, sa chemin ki bane ki fine gagne To faveurs, pas chemin bane dimounes ki attire To colère, ou bien bane ki égarer."

Pose ene question, ki sa faveurs ki zot pé demander là. Eski c'est faveur bel l'auto, la caze, térrain, bane électroménager, etc.? Bé sa bane faveurs là, bane non-croyants aussi ena. Ena, ena li plisse ki bane ki croire dans l'unicité d'Allah. Ki faveur Allah (swt) ti donne Hazrat Ibrahim (as)? C'est ki dans so descendance ti ena prophète. Bane prophètes vini de côté d'Allah et bane ki fine rejette sa bane prophètes là et même zot fine persécute sa bane prophète ki vine de côté d'Allah là, et alors zot fine attire Allah So colère et fine égarer.

Donc, ici ou pé lire même Surah Al-Fatiha, *Darood Shariff* et kan Allah (swt) envoye So serviteur choisi, ou tourne ou les dos avec tout ou l'arrogance ou aller. Bé ki serti, tous ou Fatiha et *Darood Shariff* alle dans vide.

Alors, mo termine là même et mo faire *duah* avec Allah (swt), ki Allah éclaire moi lors sa sujet là et faire moi vine ene *Muttaqi*, avec toute humilité et croire sincèrement dans To Livre, en croyant. Certainement kan ou pou lire Allah So Livre, ou pou croire dans Allah So Messager, *Insha-Allah*.